

तुबारि संपादकीय
टीम

◆अस इ उम्मिद करं लगे से कि एण बाड़े दिन अन्तर सुआ मेहणु इस कम अन्तर सहयोग कते।

◆इस तुबारि मासिक पत्रिका समाचार पत्र एकट अन्तर रिजिट्रि नेई भो। सिर्फ पांगि घाटि अन्तर पढ्ूं जे इ पत्रिका शुरु किओ सि।

◆तुबारि एक अवाणिज्यिक पत्रिका भो।

◆तुबारि पत्रिका कोइ मेहणु, जनजाति, त संस्कृति गल्लि कहेण जे नेई छपाण लगे। अगर कोइ ई सोचता बि त अस जिम्मेवार नेई।

◆छपाणे पेहले सोभ आर्टिकल दुई टाई पांगेई मेहणु हुरालो असे। इ त खुलि बोक असि कि पेहलि बार पांगवाडि लिखणे सुआ मुशकिल भुन्ति त गलति बि भुन्ति। अगर कोइ लिखणे गलति असि त असि जे जरूर बोले। त अस तसे होरे संस्करण पुठ ठीक करणे कोशिश कते।

◆आर्टिकल्स ना मिल्ल, या घाटि मेहणु के मदद ना मिल्ल त तुबारि पत्रिका कदि बि बंद भुई सकति।

◆कोइ चिज छपां सि या नेई छपां जे तुबारि संपादकीय टीमे पुरा अधिकार असा।

◆अस किलाड केन्द्रीय पुस्तकालय, त बजार राखे ठेके भेड हरिरामे दुकान अन्तर तुबारि ट्रॉप बॉक्स पुठ बि अपुं सझाव ओर आर्टिकल्स रखुं जे सुविधा किओ असि।

◆अस सोभि पांगि मेहणु जे हात जोड़ कई निवेदन कते कि, तुस बि कोइ अच्छा आर्टिकल, पुराणि या नौई कथा, कहावत, कविता, त नौवे घीत (पांगवाडी अन्तर) लिख कइ छपां जे हेंनदे दिए।

तुबारि संपादकीय टीम

9418431531
9418429574
9418329200
9418411199
9418411599



जिन्दगी

गीता शर्मा

हरेक मेहणु एक पिछाण भो अ जिन्दगी, कसेरी लिए एक वरदान त कसेरी लिए एक शाप भो अ जिन्दगी। कसेरी लिए एक सवाल, त कसेरी लिए एक जबाव भो अ जिन्दगी, कसेरी लिए ऐणेवाड़ा शुई, त कसेरी लिए घेणेवाडी रात भो अ जिन्दगी। कसेरी लिए एक खरा दन, त कसेरी लिए भयकर रात भो अ जिन्दगी। कसेरी लिए एक खुशीए बरशाड़, त कसेरी लिए गमे हिऊंत भो अ जिन्दगी। कसेरी लिए खिलता गुलाब, त कसेरी लिए शुखो फियुड भो अ जिन्दगी। कसेरी लिए खुशी तिहार, त कसेरी लिए गमे वरात भो अ जिन्दगी। कसेरी लिए उजड़ता घर-परिवार, त कसेरी लिए खिलता बाग-बागीचा भो अ जिन्दगी। कसेरी लिए बदलींता मौसम, त कसेरी लिए घेन्ता बरशाड़ भो अ जिन्दगी। कसेरी लिए फुकिणेवाडी धुप, त कसेरी लिए ठन्नी शोहधि भो अ जिन्दगी। कसेरी लिए बहन्ता दरियो, त कसेरी लिए रुको पणि लब्बु भो अ जिन्दगी। कसेरी लिए कुरा कागज, त कसेरी लिए खुली कताब भो अ जिन्दगी। कसेरी लिए मर्जी पंजरा, त कसेरी लिए उम्मीदे जाल भो अ जिन्दगी। कसेरी लिए उम्मीदे शुरुवात, त कसेरी लिए आशाई अन्त भो अ जिन्दगी। अपल तकर त अउं सोचतीथ कि में लिए एक अबल एहसास भो अ जिन्दगी, पर अब में लिए एक उलझो सवाल भो अ जिन्दगी।

पन्जाहे नोट

एक मेहणु दफ्तर केआं चरे रात तकर कम करण केआं थकी कइ गी पुजा। दवार खोलते त तेन हेरु कि तसे पन्ज साले कुवा उंघोरा नेई त अपु बोड भाड़ण बिशो असा। अन्तर एन्ते त कोइए पुछ, 'बोडआ, अउं तुसी केआं एक सवाल पुछ सकता ना?' बोडए बोलु, 'ऑ-ऑ पुछ, कि पुछता?' कोइया। 'बोडआ, तुस एक घण्टे अन्तर कत कमाते?' एस जोड़ तें कि लेणा-देणा.....तु बेकार सवाल किस करण लगे असा?' बोडए धिक लेहरी कइ इ जवाब दता।



कुवा 'अउं बस इहाणि पुछण लगे असा, बोले बे कि तुस एक घण्टे अन्तर कत कमाते?' बोडए लेहरी कइ तसे धे हेरु त बोलु 100 रुपेई" 'ठीक' तउं कोइए उन्न कुशी कइ मठे बोलु, 'बोडआ तुस मेन्धे 50 रुपेई उधार दी सकते ना?' अतु बोले त तसे बोड लेहरी गा, 'अच्छा, तउं तु फलतु सवाल करण लगे थिआ ना?' ताकि तु मोउं केआं पैसे नी कइ कोइ बेकार खिलौना या उटपटाग चीज खरीद सकियल।

चुप-चप अपु कमरे गा त उंघीण दे। सोचणी दे तु कत मतलबी असा। अउं दन रात मेहनत कर कइ पैसा कमाता त तु तस बेकार चीजी जोड़ बरबाद करण चहंता।' ई शुण कइ कोइए टीरी बइ अखू एइ गए त से अपु कमरे जे घेइ गा।

तेस मेहणु हउ बि लेहर अओरी थी त सोचुण लगो थिआ कि अखिर कुवा ई बोलुणे हिम्मत कीं आइ। पर यक आधे घण्टे केआं पता से थोडा शांत भुआ, त सोचुण लगा कि भोइ सकतु कि सच्चे में कोइए कसे जरूरी कम जे पैसे मगो भोल। किस कि आज केआं पहले तेन कदि ई पैसे न थिए मगो। फि से खइ भोइ कइ अपु कोइए कमरे गा त बोलु, 'तु उंघ गा ना?' 'ना' जवाब दूतू।

बोउए बोलु, 'अउं सोचुण लगो थिआ कि शायद बेकार अन्तर तोउं जे लेहरिया, दरअसल दन भइ कम करणे बेलिए अउं सुआ थकि गओ थिआ।'

'मोउं माफ कर हआ अपु पन्जहा रुपेई टा।' ई बोल कइ तेन अपु कोइए हथ अन्तर पन्जहाए नोट छइ छड़ा।

कोइए खुश भोइ कइ पैसे लिए त बोलु, 'धन्यवाद बोउआ' तउं से दौड़ दी कइ अपु अलमरी केई गा, तठिया तेन सुआ सिक्के कटे त गणण लगा।

ई हेर कइ तेस मेहणु फि लेहर ऐण लगी त बोलु, 'तोउं केई पहलाई पैसे थिए त मोउं केआं किस मगे?' कोइए बोलु, 'किस कि मोउं केई पैसे घठ थिए, पर अब पूरी गए।'

'बोउआ अब मोउं केई 100 रुपेई असे, अब कि अउं तुं यक घण्टा खरीद सकता ना? छने-बने तुस इन्हि पैसी घिन घिए त शुइ बियदी गी झठ एइ घिए। अउं तुसी जोड़ साते बिश कइ खाजे खाण चाहंता।'

दोस्तो, इस जिन्दगी भाग-दौड़ अन्तर अस अत ब्यसत भोइ घेन्ते कि तन्हि इन्सानी जे टेम न कढ बटते, जे हे जिन्दगी अन्तर खास असे। तउं त असी ध्यान रखण ऐन्ता कि इस भाग-दौड़े जिन्दगी अन्तर बि असी अपु ई-बोउ, लखि सथि, गभुरु त दोस्ती जे टेम कढण। न त यक रोज असी बि एहसास भुन्ता कि असी छोटी-मोटी चीजे पाणे लिए सुआ किछ खोई छऊ।

बोउ अपु कुआ पुछण लगो असा.....

बबीता

तैं मस्टर मोउं जोड़ किस मीण चाहता.....!



में होमवर्क अन्तर तुस रोज गलती कते.....! तउं.....!

ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please 9418429574

सोभि पंगेई मेहणु के छने अरे कते हियुंत मेहना लगो असा त सुआ ठन्यारी असी। तिहार बि लगणेवाड़े असे त सुआ अराख न पिए। अपु कुई-चीड़ी त सकि नति जोइ तिहार मनए। सुवा अराख पी कइ अपु सेहद खराब न करें।.....